



## ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆ ՄՐՑԱԿՑՈՒԹՅԱՆ ՊԱՇՏՊԱՆՈՒԹՅԱՆ ՀԱՆՁՆԱԺՈՂՈՎ

### Ո Ր Ո Շ ՈՒ Մ

5 հոկտեմբերի 2021 թվականի թիվ 276-Ա

#### «ԻՄՊԵՐԻԱԼ ՊԱԼԱՍ ՀՈԹԵԼ» ՍԱՀՄԱՆԱՓԱԿ ՊԱՏԱՍԽԱՆԱՏՎՈՒԹՅԱՄԲ ԸՆԿԵՐՈՒԹՅԱՆ ԵՎ ՖԻԶԻԿԱԿԱՆ ԱՆՁ ՎԱԼԵՆՏԻՆ ՍԱՐԳՍՅԱՆԻ ԿՈՂՄԻՑ ՏՆՏԵՍԱԿԱՆ ՄՐՑԱԿՑՈՒԹՅԱՆ ԲՆԱԳԱՎԱՌՈՒՄ ԻՐԱՎԱԽԱԽՏՄԱՆ ՎԵՐԱԲԵՐՅԱԼ ՎԱՐՈՒՅԹ ՀԱՐՈՒՑԵԼՈՒ ՄԱՍԻՆ

Մրցակցության պաշտպանության հանձնաժողովը (այսուհետ նաև՝ **Հանձնաժողով**) 2021 թվականի հոկտեմբերի 5-ի նիստում, քննարկելով «Իմպերիալ Պալաս Հոթել» սահմանափակ պատասխանատվությամբ ընկերության (այսուհետ նաև՝ **Ընկերություն**) և ֆիզիկական անձ Վալենտին Սարգսյանի կողմից տնտեսական մրցակցության բնագավառում իրավախախտման վերաբերյալ վարույթ հարուցելու մասին հարցը,

### Պ Ա Ր Զ Ե Ց

Հանձնաժողովը 2021 թվականի հուլիսի 6-ին ««Իմպերիալ Պալաս Հոթել» սահմանափակ պատասխանատվությամբ ընկերության և ֆիզիկական անձ Վալենտին Սարգսյանի կողմից տնտեսական մրցակցության բնագավառում իրավախախտման վերաբերյալ վարույթ հարուցելու մասին» թիվ 150-Ա որոշմամբ (այսուհետ նաև՝ **Թիվ 150-Ա որոշում**) հարուցել է վարույթ (այսուհետ նաև՝ **Վարույթ**) Ընկերության և ֆիզիկական անձ Վալենտին Սարգսյանի կողմից 2019 թվականի սեպտեմբերի 23-ի համակենտրոնացումը Օրենքով սահմանված կարգով չհայտարարագրելու առիթով:

Հարուցված վարույթի շրջանակներում ֆիզիկական անձ Վալենտին Սարգսյանը Հանձնաժողով ներկայացրած գրությամբ հայտնել է, որ մինչև բաժնեմասի ձեռք բերելը իր՝ Վալենտին Սարգսյանի և Արմենուհի Լիպարիտի Մալխասյանի միջև 2019 թվականի մարտի 25-ին կնքված Հանձնարարության պայմանագրի շրջանակներում իրականացրել է մասնակցի լիազորություններից բխող որոշակի լիազորություններ՝ այնուհետև գնելով Ընկերության բաժնեմասը: Մասնավորապես, վերոնշյալ գրությանը կից ներկայացված Հանձնարարության պայմանագրի 1.1-ին կետի համաձայն՝ Վալենտին Սարգսյանը

պարտավորվել է Արմենուիի Լիպարիտի Մալխասյանի անունից և ի շահ նրան իրականացնել «Իմպերիալ Պալաս Հոթել» սահմանափակ պատասխանատվությամբ ընկերության մասնակցի հետևյալ գործառույթները՝ Ընկերության տնօրենի նշանակում, նրա լիազորությունների վաղաժամկետ դադարեցում, Ընկերության աուդիտ իրականացնող անձի հաստատում, Ընկերության ներքին գործունեությունը կարգավորող փաստաթղթերի ընդունում, Ընկերության գործունեության հիմնական ուղղությունները փոփոխելու կամ նոր գործունեության ուղղություններ ավելացնելու առաջարկություններ ներկայացնելը, ժողովի որոշումների քննարկմանը մասնակցելը: Վալենտին Սարգսյանը նշել է նաև, որ մինչև 2019 թվականի սեպտեմբերի 23-ին ֆիզիկական անձ Վալենտին Սարգսյանի կողմից Ընկերության կանոնադրական կապիտալում Արմենուիի Լիպարիտի Մալխասյանին պատկանող 100 տոկոս բաժնեմասի ձեռքբերման գործարքի իրականացումը Հանձնարարության պայմանագրի 1.1 կետի համաձայն Վալենտին Սարգսյանի կողմից իրականացվել են Ընկերության մասնակցի լիազորություններից բխող մի շարք լիազորություններ, որոնց վերաբերյալ որպես հիմնավորող փաստաթղթեր Հանձնաժողով են ներկայացվել 2019 թվականի ապրիլի 18-ին ստորագրված N 4-19/1, 2019 թվականի ապրիլի 29-ին ստորագրված N 4-19/2 և 2019 թվականի ապրիլի 29-ին ստորագրված N 5-19/1 հրամանները:

Հանձնաժողովի 2021 թվականի հուլիսի 6-ի թիվ 150-Ա որոշմամբ հարուցված վարույթը Հանձնաժողովի 2021 թվականի հոկտեմբերի 5-ի թիվ 275-Ա որոշմամբ կարճվել է իրավախախտման դեպքի բացակայության հիմքով, հաշվի առնելով, որ Վալենտին Սարգսյանի կողմից Ընկերության կանոնադրական կապիտալի 100 տոկոս բաժնեմասի ձեռքբերման գործարքը գործողության մեջ դնելու պահին գործարքի մասնակիցների միջև առկա են եղել անձանց խմբի հատկանիշներ՝ Հանձնարարության պայմանագրի գործողության ուժով:

Ընկերության կողմից Հանձնաժողով ներկայացված տեղեկատվության համաձայն՝ Ընկերությունը զբաղվում է հյուրանոցային ծառայությունների մատուցմամբ: Ընկերության կանոնադրական կապիտալի 100 տոկոս բաժնեմասը պատկանում է Արմենուիի Լիպարիտի Մալխասյանին: Ընկերության 2018 թվականի ֆինանսական տարվա ակտիվների արժեքը կազմել է

|  |                          |       |
|--|--------------------------|-------|
|  | դրամ, իսկ հասույթի չափը՝ | դրամ: |
|--|--------------------------|-------|

««Տնտեսական մրցակցության պաշտպանության մասին» օրենքում փոփոխություն կատարելու մասին» 2021 թվականի մարտի 3-ի ՀՕ-92-Ն օրենքի (ուժի մեջ է մտել 2021 թվականի մայիսի 31-ին) 1-ին հոդվածով «Տնտեսական մրցակցության պաշտպանության մասին» օրենքը (այսուհետ՝ Օրենք) շարադրվել է նոր խմբագրությամբ:

Մինչև 2021 թվականի մայիսի 31-ը գործող խմբագրությամբ Օրենքի 8-րդ հոդվածի 1-ին մասի 5-րդ կետի համաձայն՝ տնտեսվարող սուբյեկտների համակենտրոնացում է համարվում տնտեսվարող սուբյեկտների ցանկացած գործարք, գործողություն, վերակազմակերպում կամ վարքագիծ, որի շնորհիվ տնտեսվարող սուբյեկտն ուղղակիորեն կամ անուղղակիորեն կազդի այլ տնտեսվարող սուբյեկտի որոշումների կայացման կամ մրցունակության վրա կամ կարող է ուղղակիորեն կամ անուղղակիորեն ազդել մեկ ուրիշի որոշումների կայացման կամ մրցունակության վրա:

Մինչև 2021 թվականի մայիսի 31-ը գործող խմբագրությամբ Օրենքի 9-րդ հոդվածի համաձայն՝ տնտեսվարող սուբյեկտների համակենտրոնացումը, մինչև գործողության մեջ դնելը, ենթակա է հայտարարագրման, եթե՝ համակենտրոնացման մասնակիցների ակտիվների կամ հասույթի ընդհանուր արժեքը (չափը) կամ մասնակիցներից առնվազն մեկի ակտիվների կամ հասույթի արժեքը (չափը) դրա ստեղծմանը նախորդող վերջին ֆինանսական տարում գերազանցել է Հանձնաժողովի 2016 թվականի դեկտեմբերի 16-ի «Հայտարարագրման ենթակա համակենտրոնացումների մասնակցի (մասնակիցների) ակտիվների և հասույթ(ներ)ի արժեքը (չափը) սահմանելու, տնտեսվարող սուբյեկտների համակենտրոնացման հայտարարագրման կարգի հայտարարագրի ձևի մասին» թիվ 478-Ն որոշմամբ սահմանված ակտիվների կամ հասույթ(ներ)ի արժեքը (չափը):

Մինչև 2021 թվականի մայիսի 31-ը գործող խմբագրությամբ Օրենքի 10-րդ հոդվածի 4-րդ մասի 1-ին ենթակետի համաձայն՝ արգելվում է հայտարարագրման ենթակա համակենտրոնացումը գործողության մեջ դնելը՝ մինչև Հանձնաժողովի կողմից որոշում կայացնելը (չհայտարարագրված համակենտրոնացում):

Մինչև 2021 թվականի մայիսի 31-ը գործող խմբագրությամբ Օրենքի 31-րդ հոդվածի 1-ին մասի համաձայն՝ սույն օրենքի խախտման դեպքում Հանձնաժողովն իրավասու է իր որոշմամբ տալու նախազգուշացում կամ նշանակելու տուգանք:

Մինչև 2021 թվականի մայիսի 31-ը գործող խմբագրությամբ Օրենքի 36-րդ հոդվածի 4.1-ին մասի համաձայն՝ համակենտրոնացումը չհայտարարագրելու համար նշանակվող տուգանքի չափը կազմում է մինչև հինգ միլիոն դրամ:

Վերոգրյալ իրավակարգավորումներին նույնաբովանդակ դրույթներ նախատեսված են նաև Օրենքի 13-րդ, 15-րդ, 73-րդ, 92-րդ և 93-րդ հոդվածներով:

Ստացվում է, որ Վալենտին Սարգսյանը Հանձնարարության պայմանագրի ուժով հնարավորություն է ստացել կանխորոշելու Ընկերության կողմից ընդունվող որոշումները (այդ թվում՝ ձեռնարկատիրական գործունեություն իրականացնելու պայմանները): Վերոգրյալի հաշվառմամբ Հանձնաժողովը գտնում է, որ 2019 թվականի մարտի 25-ին Վալենտին Սարգսյանի և Արմենուհի Լիպարիտի Մալխասյանի միջև Հանձնարարության պայմանագրի կնքման ուժով Վալենտին Սարգսյանի կողմից Ընկերության գործունեության, որոշումների կայացման կամ մրցունակության վրա ուղղակիորեն կամ անուղղակիորեն ազդելու հնարավորության ձեռքբերումը Օրենքի 8-րդ հոդվածի 1-ին մասի 5-րդ կետի իմաստով առերևույթ պարունակում է համակենտրոնացման տարրեր:

Հաշվի առնելով, որ Ընկերության՝ Հանձնարարության պայմանագրի կնքմանը նախորդող ֆինանսական տարվա ակտիվների արժեքը գերազանցել է Հանձնաժողովի 2016 թվականի դեկտեմբերի 16-ի թիվ 478-Ն որոշմամբ սահմանված ակտիվների արժեքը, ինչպես նաև այն հանգամանքը, որ ներկայացված տեղեկությունների համաձայն՝ Ընկերության և ֆիզիկական անձ Վալենտին Սարգսյանի միջև Հանձնարարության պայմանագրի կնքման պահին անձանց խմբի հատկանիշների վերաբերյալ տեղեկություններ առկա չեն, ֆիզիկական անձ Վալենտին Սարգսյանի կողմից Ընկերության գործունեության, կայացվող որոշումների կամ մրցունակության վրա ուղղակիորեն կամ անուղղակիորեն ազդելու հնարավորության ձեռքբերմամբ դրսևորված

համակենտրոնացումը Օրենքով սահմանված կարգով չհայտարարագրելը առերևույթ պարունակում է Օրենքի խախտման հատկանիշներ:

Հաշվի առնելով վերոնշյալը՝ Հանձնաժողովն անհրաժեշտ է համարում Ընկերության և ֆիզիկական անձ Վալենտին Սարգսյանի կողմից տնտեսական մրցակցության բնագավառում իրավախախտման հատկանիշները պարզելու նպատակով հարուցել վարույթ:

Ելնելով վերոգրյալից և հիմք ընդունելով Օրենքի 76-րդ հոդվածի 1-ին մասի 3-րդ կետը, 79-րդ հոդվածի 3-րդ մասի 1-ին կետը, 83-րդ հոդվածի 1-ին մասը և 42-րդ հոդվածի 2-րդ մասը՝ Հանձնաժողովը

## **Ո Ր Ո Շ Ե Ց**

1. «Իմպերիալ Պալաս Հոթել» սահմանափակ պատասխանատվությամբ ընկերության և ֆիզիկական անձ Վալենտին Սարգսյանի կողմից տնտեսական մրցակցության բնագավառում իրավախախտման վերաբերյալ հարուցել վարույթ:

2. Սույն որոշումն ուժի մեջ է մտնում ընդունման պահից:

**ՆԱԽԱԳԱՀ**

**Գ. ԳԵՎՈՐԳՅԱՆ**

2021 թ. հոկտեմբերի 5  
Երևան